





120-

LE BON
FRANCOIS A
MESSIEURS DV
PARLEMENT.

SUR LE NOUVEAU
CONNESTABLE.

M. DC. XXI.

THE NEWBERRY
LIBRARY

Ces

F

39

326

162162

CHoquerez-vous tousiours l'auctorité du Roy, vous qui ne tenez vostre auctorité que de luy, serez-vous tousiours opiniastrés à contrecarer ses volontés, vous qui n'en estes que les executeurs? faut il que vos arrests s'opposent à ses Edicts, vos Conseils à ses intentions, & vos paroles à ses comandemens? Ces voix dont il a autorisé l'organe pour absoudre quelquesfois les coupables oseront elles bien condamner les iustes ordonnances de leur Souuerain? Que ses Edicts qui sont autât d'Oracles soient mis à la senceure de ses subiects, que l'inférieur controle les actions & les volontés de son Maistre, que ce qui part du cabinet soit espluché dans la basse court, c'est venir tout à fait de la Monarchie à ce miserable Estat populaire de la premiere Roynie, pleine desmente & de seditions, où les tribus balloroient les arrests du Senat.

Ignorez vous Messieurs, que les Roys tiennent de la Diuinité: que les secrets mouuemens de leurs cœurs soient guidez & reglez par vne intelligence plus haulte, & plus sublime que ceux des autres hommes? & qu'il y à quelque chose d'auguste & de mystereux en tout ce qu'ils font ou qu'ils disent, dont les ressorts sont cachez au vulgaire, ils viennent souuent à reprédre ce qu'ils ne peuuent comprendre. Ce seroit estre priué de sens commun de debouter que cet vniuers ne soit conduit par les ordres de la prouidence Diuine, qui fait reluire de tous costez les rayons de sa prouidence, en la pollice de toutes les parties du Monde.

Plusieurs neantmoins mesurans les euenemens d'icy bas aux maximes de leur iugemens, y trouuent à redire. Ils entreprendroient volontiers la conduite du temps & des saisons pour les reigler à leur mode, ne trouuant pas qu'elles aillent bien, & côme il faudroit. Il pleut quand il ne faut pas suiuant leurs aduis, il ne pleut pas quand il

en est besoin: tout va ce leur semble à contretèps, mais au bout du compte, l'année est plantureuse, & les fruits de la terre respondent au souhait & à l'esperance du laboureur, par la sage conduite de celuy qui fait tout pour le mieux, par des moyens incogneus, & bien souuent impreueus par les hommes. Lors qu'un pauvre blessé perd son sang par vne ou plusieurs playes qu'on ne peut estancher, le sage Medecin ne laisse pas de luy ouvrir la veine, & de luy entirer d'auantage par vn costé, pour l'arrester de l'autre. Le vulgaire ignorant des effects de la reuultion, condamne entierement ce remede. On nous renuerse l'estomach, & vne medecine qui trouble l'harmonie du corps, & met sans dessus dessous, toutes les humeurs, nous faisant pour vn temps plus malades que nous ne sommes, mais c'est pour nous faire couler insensiblement dans le calme de la santé.

Ainsi Messieurs, ces derniers declarations & ces Edicts nouueaux, quoy que mouflez premierement dans le Conseil priué, issus du cerueau d'un grand Roy, & qui ont passé par l'estamine de tant de rares personages consummez aux affaires d'Estat, vous semblent neantmoins preiudiciables au bien public, ne cōsiderans point qu'ils ne visent qu'à l'establissement d'iceluy. Vous criez qu'on veut separer vos charges, & ruiner vos Estats, & vous ne voyez pas que l'on les affermit d'auantage.

Mais non, ie ne vous croy pas si peu clair voyant, n'y si iniustes en vos sentimens que vous ne cognoissiez les iustes raisons qu'à le Roy en l'Estat ou se treuuent maintenant ses affaires, & après des despences extraordinaires, que la necessité luy a fait faire, d'auoir recours à quelque ayde extraordinaire, qui est le secours anticipé du droit criminel que vous auiez accoustumé de payer tous les ans pour l'assurance de vos Estats. Et m'assure que si l'on ne se fut adressé qu'à l'Artisan ou au Labou-

reur, sans toucher à vos bourses, vous n'eussiez pas fait tant de difficulté d'y prester vos consentemens. Mais par ce que la chose vous touche, vous opposez vos particuliers interrests aux interrests du Roy, & ne voudriez vous incommoder tant soit peu pour l'accommoder, y allant mesme de vos commoditez, & de celle de tout le peuple, sans considerer que le bras qui n'a point de mal, s'offre bien à recevoir le coup de lancette, pour sauuer tous les autres membres, du salut desquels depend encore le sien.

Vous vous targués, Messieurs, du credit que vostre corps à tousiours eu, mesme du temps que Hugues capet, qui ne faisoit rien que par l'aduis de son Parlement. Mais vous ne considerez qu'alors les grands du Royaume ne reconnoissoient ce nouuel establissement de Royauté, comme nous le cognoissons à cest heure qu'il a passé par vne succession legitime de vingt-neuf Roys, & de plus de six Siecles entiers, & qu'il auctorisoit ces compagnies, pour s'en seruir contre ceux qui detenoient les pieces principales de l'Estat, ces Parlemens estans composés de plus grands du Royaume, soit de naissance, soit de rang: aussi y assistoit il bien souuent, comme le Roy va en son Conseil d'Estat, qui represente ce qu'estoient lors ces Parlemens, du corps desquels nous voyons qu'estoient le Connestable, & le garde des Sceaux, & les Prelats. Et sous Louys, se treuve que le Chancellier en estoit President, il ne faut donc s'estonner si c'este compagnie estoit en telle estime: & si les Empereurs & les Papes ont remis quelquesfois leurs differens à leur decision, comme fit Federic, II. ce qu'il auoit à demesler avec Innocent III.

Je sçay bien que depuis que le Parlement fut fait stable, il fut trouué bon que les volontez de nos Roys, qui alloient à quelque police, & reiglement, n'obtinsent

5
lieu d'Edict : qu'elles n'eussent esté verifiées & emologuées en ce lieu, deffereus nos Roys grandement aux deliberations de sa Cour. Mais ce n'est pas à dire qu'ils s'obligent entierement à cela, & qu'ils ne se puissent dispenser de ses formes quand bon leur semblera. Le Parlement s'est opposé d'autrefois à quelques Edicts qu'il n'aprouoit point, iusques à la, que de venir en corps trouuer le Roy chez luy, & luy dire qu'ils aymoient mieux quitter leurs charges que d'y apporter leur cōsentement : mais c'estoit en des choses visiblement preiudiciables au Roy & à son Estat, & où ses Officiers pensoiēt interesser leur conscience, encore procedoient ils plustost modestement que non pas de donner vn Arrest entierement contraire à sa volonté.

Je sçay bien encore, que l'ors qu'on veut faire d'une passion vne Loy, & que le Prince mal informé d'un fait, s'est laissé preuenir & surprendre en des choses, qui sous quelque apparence de bien, tirent apres elles beaucoup de maux. Nos Roys sont bien aises & ne trouuent mauuais que le Parlement en face quelque opposition, comme fit le grand Roy François sur vn Edict que certains Italiens auoient extorqué de luy par importunité : & encore qu'il leur eust commandé de le verifier par plusieurs fois, & reiterées iussions, iusques à les menacer s'ils ne le faisoient, il leur sceut neantmoins bon gré, & les loia par apres, d'y auoir apporté ceste difficulté : mais l'on sçauoit bien que le Roy ne faisoit ses iussions que par mine, n'ayant nullement la volonté de le faire passer : car s'il l'eust commandé tout à bon, il n'y a point de doute qu'il luy eust falu obeir. C'est la grandeur d'un Roy de ne rien refuser, & de donner de parole tout ce qu'on luy demande : mais c'est à celuy qui tient la bourse de mesnager l'argent, & y accommoder la liberalité de son maistre, toutesfois quand il cōmande absolument

& specifie la somme qu'il veut estre donnée, il faut trouuer de quoy n'en fust il point dans l'espargne. Ainsi bien souuēt les volontez du Roy quoy qu'exprimées en forme d'expres commandement, sont conditionnées avec ceste interpretation, que sa Majesté entend qu'elles sortent leur plain & entier effect, pourueu qu'elles ne soiēt contre droit & raison, & n'apportent aucun preiudice au bien de l'Estat.

Mais quand apres vne meure deliberation de son Conseil il fera quelque Edict, ou declarare sa volonté pour la faire mettre en execution par les Officiers de sa Iustice le commandant absolument & en maistre, tant s'en faut qu'il s'y faille opposer, qu'il y va de la conscience à ne l'aprouer pas.

Pensez vous que ce fust sans exemple quand le Roy feroit enteriner ses Edicts, sans vostre approbation? feuilletez vos registres, & vous trouuerez l'Edict reuocatoire des ordonnances contre les abus de la Cour de Rome, dont le Chancelier & le Comte de S. Paul, lors Gouverneur de Paris l'an 1418. firent par le commandement du Roy, publier les lettres sans ouyr le Procureur General, commandant le Chancelier qu'on y mis ces mots: *Leués & publiees* que le Greffier ne voulut iamais rayer, encore que la Cour luy commandast avec menaces, disant qui se garderoit bien de mesprendre.

Qu'on lise la vie de Louys xi. & l'on y trouuera qu'il n'vsa guere de l'autorité de la Cour, sinon entant que directement elle s'accordoit à ses volontez. Car estant encore Dauphin, & voulant faire publier vne certaine donation que le Parlement ne vouloit admettre, se leua vn Euesque qui remonstra que Monsieur le Dauphin l'auoit enuoyé là pour la faire publier. La Cour n'osa s'opposer à la volonté du fils de son Roy: seulement fit elle enregistrer sur le reply des lettres: De l'expres com-

mandemēt du Roy, que le Dauphin leur fit rayer, avec menaces s'ils n'obeïssioient. Depuis le mesme Louys estant Roy, fit publier l'an 1465. vne donation contre le gré de la Cour, qui pensoit estre assez deschargée, en protestant que c'estoit par le tres-expres commandement du Roy, sans qu'elle en soit iamais venue à la que de prononcer quelque Arrest cōtraire aux Edicts ou Declarations du Roy, comme vous fistes dernièrement, sans considerer le pouuoir que le Roy a de vous punir par l'interdiction de vos charges, ce qui ne seroit sans exemple: Car Charles VI. par lettres potentes du 15. May 1436. interdit le Parlemēt & la Chambre des Comptes, pour bien moindre sujet. Ou par le retrenchemēt de vostre Iurisdiction, en faisant de nouveaux Parlemēs, comme Louys XII. qui en institua quatre tout à la fois, vous renfermant dans les bornes que vous avez maintenant, vous qui vous estendiez iusques aux extremités du Royaume: Ou bien creant en chaque Presidial des Conseillers qui iugent en dernier ressort, comme fit Henry II. Ou faisant le Parlement semestre à la façon du grand Conseil, comme fit le mesme Roy l'an 1554. Ou par la creuē de nouveaux Conseillers & Presidens, comme elle fut sous François I. qui en crea vingt d'extraordinaire tout à la fois: Ou finalement par l'election d'une nouvelle Chambre, comme fut en l'an 1580. la seconde Chambre des Requestes par le Roy Henry III. avec la creation de vingt nouveaux Conseillers, qui furent espars par les Chambres des Enquestes, sans qu'il y eu aucune nécessité de ce faire.

Mais ce qui vous rend si hardis, est la stabilité de vos offices, qui ont esté continuez depuis Charles VII. Car auparavant, & mesme encor du temps de Philippes le Bel, qui arresta le Parlement à Paris, ne voulant plus qu'il fut ambulatorie, vos charges n'estoient que les sim-

ples commissions limitées à certain tempts, & auoit accoustumé le Roy de faire vne liste de ceux qu'il vouloit auoir seance du Parlement, & en excluoit ceux que bon luy sembloit. Si ce reglement estoit restably au corps de la Iustice, & que la venalité des offices, introduite par Louys XI. & depuis toleree par ses successeurs, en fust entierement abolie; ie m'asseure que vous vous monstrieriez plus souples aux commandemens du Roy que vous ne faictes.

Encore donc que nos Roys ayent tant deferé de tout temps aux Officiers de ceste Cour Souueraine, que de les admettre pour approbateurs & verificateurs de leurs Edicts, ce n'est pourtant qu'une forme, comme i'ay desja dit. Car quand le Prince parle absolument, & donne à entédre qu'elle est sa volonté par quelque declaration comme fut la derniere touchant le droit annuel, il ne vous est pas permis d'en empescher l'execution comme vous auez voulu faire; autrement vous feriez problematique vne proposition que l'on n'a iamais reuouqué en doute, à sçauoir si le Roy est par dessus le Parlement, comme on met en dispute, si le Pape est par dessus le Concile. Et certes c'est vne chose estrange que le mesme Parlement ayant souuent prononcé nos Roys francs de la censure de Rome, les veuille neantmoins assujettir à la sienne.

Vous auez d'autres fois entrepris de reprimer l'autorité licentieuse que se donnoit l'Vniuersité de Paris abusant des honneurs & prerogatiues dont nos Roys l'auoyent obligée, ayans bien eu la hardiesse l'an 1417. d'arrester prisonnier le Recteur, & faire mener plusieurs des Professeurs en la Cōsiergerie du Palais; & vous pensez que le Roy n'aura pas le pouuoir de chastier le mespris que vous faictes de son autorité. Ne vous souuenez-vous pas du Roy Charles IX. & comme il s'en fit croire,

croire, n'ayant encore atteint l'age de 14. ans, pour la verifcation d'un Edict qui estoit de bien plus grande importance que ceste derniere declaration, lequel il fit passer de pleine autorité, sans qu'il fust mesme à Paris, adioustant à son proceder des rigueurs & contraintes (dont le Roy d'apresent, pour l'excez de sa bonté naturelle, ne s'est encor seruy) & deffendant tres estroitement à son Parlement de prendre aucune cognoissance des affaires d'Estat.

Ce n'est donc par obligation, Messieurs, que le Roy vous faict veriffier ses Edicts, ny pour leur donner plus d'autorité; car sa volonté seule, & l'oracle de sa voix, fussent pour les autoriser assez: mais il defere cest honneur à la Court Souveraine: a fin qu'elle prenne le soin de les faire émoluer: & observer par tout son Royaume. Et ne doutez pas que le Roy ne puisse donner extraordinairement ceste commission à quelque autre Cour, ayant iurisdiction, ou subalterne, ou dependante, quand bon luy semblera, comme il a faict d'autres fois, en fait mesme de pardon & octroy de grace; & en d'autres affaires d'Estat à Messieurs de la Chambre des Compres, ainsi que l'on peut voir par les lettres de Philippes de Valois du 9. Mars 1539.

Pensez-vous que les autres Corps n'ayent pas eu d'autres fois, & ne retiennent encore pour le iourd'huy beaucoup de pouuoir & d'autorité, de laquelle neantmoins ils n'abusent pas, & scauēt iusques à quel point il la faut estendre. En quelle estimation estoit iadis l'Vniuersité de Paris, que nos Roys honoroient du nom de Fille aisnée, & à laquelle ils deferoient tant que de luy communiquer toutes les plus importâtes affaires, pour en auoir ou l'aduis, ou l'approbation, non seulement en ce qui regardoit la conscience & la Religion, mais encores aux choses politiques. Est-ce à dire pourtant qu'il

y eust du deuoir ou de l'obligation du costé du Roy, & qu'il en deust passer par où il eust pleu à Messieurs de Sorbonne, soit pour la guerre soit pour les finances, & autres semblables affaires qui ne sont pas de leur gibier: C'eust esté veritablement tenir le Roy en tutelle, & former vne Aristocratie au milieu d'un estat Souuerain à la façon des Ephores de Sparte, qui cōdomnoïent leur Roy, non seulement à l'amende, mais encore au bānissement.

Il estoit permis à l'Vniuersité de faire de tres-humbles remonstrances au Roy sur les incidens qui se presentoient, comme elle faisoit bien souuent avec toute sorte de respect, & comme il vous est encore permis à vous autres Messieurs du Parlement: mais d'y resister avec tant d'animausité, comme vous auez desia fait par deux fois, de tenir ses Edicts en souffrance, & s'opposer à ses declarations? c'est passer ce me semble toutes bornes de bien seance. Censurer les commandemens de son Roy, est vne hardiesse bien grande; ny obeir point est vn crime: mais d'empescher, voire mesme defendre aux autres, sous des peines expresses d'y obeir, c'est où ie ne croyois pas que peust arriuer le mespris des sujets enuers leur Souuerain.

Ie laisse à part les attaques & inuectiues trop libres, ce me semble, de quelques vns de vostre corps, contre les plus fideles seruiteurs du Roy, & ceste particularité de vostre Arrest de faire informer, & vouloir prendre cognoissance de cause de la maluersation des Finances, & du pretendu desordre de l'Estat: qui est s'en prendre directement aux Officiers à qui le Roy en a donné le maniment, & taxer indirectement le Roy mesme de peu de iugement, & ne sçauoir faire le choix des gens dont il se veut seruir. Mais la prudence qui reluit en toutes ces actions Royales, & la vie exemplaire & irreprehensible de ceux qui ont la conduite des plus importantes

affaires de son Estat, & celle de ses Finances, seruent d'Apologie à ces reproches fondez plustost sur l'enuie que sur la verité.

Mais pour monstrez, Messieurs, que ce n'est pas tant le zele du bien public, comme vostre particulier interrest, qui vous a portez à ceste des-obeissance : c'est que lors qu'il a esté question d'aliener le domaine du Roy, de faire de nouvelles impositions sur le peaple, de proscrire les plus grands du Royaume, & d'approuuer mille semblables choses, que l'ordre ou le desordre & le malheur du temps apportoit, vous ne vous estes pas monstrez si difficiles, ou si vous l'avez fait, comme au dernier Edict des Offices de Procureurs : vous l'avez finalement passé, sans venir à vn Arrest contradictoire, comme vous avez fait à ce coup.

Mais venons au fonds ie vous prie, & considerons si vous estes tant greuez comme vous criez. On éualuë vos offices plus qu'ils n'estoient, & sur ce pied on vous demande vne certaine somme anticipée qui reuient à quatre anneés d'auance pour le droit annuel que vous auez demandé avec tant d'importunité, pour sauuer vos offices : Vous voyla bien gastez, puis qu'on vous les rembourse sur le quart denier de la resignation. Et quand cela ne seroit, prenez le cas que cét argent est au lieu de celuy que vous receuez des plaidans, dont vous vous prieuez pour trois ou quatre ans ; ce qui ne vous doit estre rude, puisque vos Majeurs se contentoient anciennement de leurs gages, & ne prenoient des parties que quelques confitures qu'on appelloit espices.

Ou bien encore que cest vn prest que vous faictes au Roy, & qu'il vous demande par emprunt, comme faisoient anciennement ses predecesseurs, vous assurant vostre argent sur le fond mesme dont il le prend : Ce que vous ne luy deuez refuser si vous estes bons sujets, at

tendu que ces deniers ne se doiuent employer inutilement pour en faire des dons & des profusions, comme plusieurs pensent mal à propos. Il y auroit quelque sujet de le croire, si le Roy n'eust fait aucune despence extraordinaire, mais ayant espuisé toutes ses Finances, & enticipé mesme sur l'annee qui vient, pour subuenir aux frais de la guerre; dequoy voulez vous qu'il remplace ce qu'il a soustrait à la despence mesme de sa Maison? dequoy voulez vous qu'il rembourse les Tresorriers de l'Espargne, qui ont auancé des millions, tant du leur, que de ce qu'ils ont emprunté, & qui sont en arriere de plusieurs quartiers? dequoy voulez-vous en fin que sa Majesté recompence ses bons & fideles seruiteurs qui l'ont assisté en ces derniers mouuemens? De surcharger le pauvre Païsan, qui à esté rongé iusques aux os, il n'y a point d'apparence? D'affoiblir la monnoye, comme on fit souz Philippes le Bel, on auroit plus de sujet de se plaindre? D'introduire des maletotes sur toutes sortes de denrée, comme souz Philippes le Long, il y auroit bien plus de crierie? D'establir la pancarte par tout le Royaume, comme sous Henry II. cela pourroit causer quelque mutinerie? De faire vne taille extraordinaire par teste en forme de capitation Romaine, comme on fit souz François I. seroit vn peu de dure Digestion. Pour ne venir donc point à ceste rigueur d'exactions, on trouue le moyen le plus doux qu'on eust sceu excogiter pour subuenir aux necessitez presentes du Roy, par lequel ceux qui sont incommodez d'un costé s'accomodent de l'autre, qui est le droit annuel, désiré grandement, & requis de ceux qui ont des offices pour les asseurer, avec telles conditions que ce qui se perd d'une part, se remplace de l'autre; & la playe n'est si tost faite, que le cataplasme ny soit appliqué, à la façon de la lance d'Achille, qui guerissoit la

blesseur qu'elle auoit faite. O les mauuais meſnagers que vous estes ! vous vous pensez esparagner vn escu & courez fortune d'en perdre quatre ; ie ne dis pas pour la risque que vous faictes courir à vos offices, mais pour le danger d'une guerre que vous nous pourriez mettre sur les bras en ny pensant pas, & ce par vostre meſnagere circonspection ? car ne sçauiez-vous pas que l'argent est aussi bien instrument de la paix comme de la guerre : & que si l'on voyoit le Roy foible de ce costé, cela pourroit donner sujet à plusieurs mauuais esprits de se seruir du temps ; là où s'il en est bien pouruen, ils y penseront plus de quatre fois auant que l'entreprendre. Or qui ne voit que trois mois de guerre vous apportēt beaucoup plus de dommage que ne font trois années de droit annuel.

Ne vous plaignez donc pas hors de propos, & n'allez plus disant qu'on vous rend taillables : car le Roy ne vous force point à donner ce droit, le laissant purement à la liberté d'un chacun, sans y adiouter des conditions plus rigoureuses qu'auparauant, sinon de ceste auance qui vous sera tousiours remboursée. Vous voyez comme vn chacun s'esuertue à secourir les necessitez presentes du Roy. Le Clergé par le surcroist des decimes ; la Noblesse par l'espée & le renoncement de ses pensions, ou pour le moins de la moitié d'icelles ; les Financiers, par l'aduence de six années ; le tiers Estat, par les charges & impositions, tant ordinaires qu'extraordinaires. Pourquoy serez vous seuls exempts de contribuer au bien public, comme s'il ne vous touchoit pas aussi bien qu'aux autres.

Lors qu'il fut question d'aller faire de nouuelles conquestes hors du Royaume, comme en Leuant souz le Roy Louys IX. ou en Angleterre souz Charles VI. on ne pensoit pas auoir satisfait, ou au deuoir, ou à la con-

science de contribuer les reuenus seulement : mais la pluspart vendioient le fonds & les heritages , pour vn si bon sujet. Et vous, Messieurs, pour conseruer vos propres maisons & vos heritages , par le moyen d'vne paix de durée que le Roy veut establir en France, ferez difficulté d'employer vne si petite partie de vostre reuenue.

Puis donc, Messieurs, que la declaration du Roy touchant le reestablissement du droit annuel, n'est qu'un reglement de Finance adressé au Seau, & signifié aux Tresoriers generaux de France, pour le faire publier par toutes les Elections, chose qui n'est nullement de vostre ressort : puis que le secours que le Roy en attend est fondé sur de bons & legitimes subjects; puis que l'on desdommage l'interest qu'il y semble auoir : puis que la suruiuance de vos offices vous est octroyée, & que pour peu vous asseurez beaucoup : puis que finalement c'est vne chose volontaire, & qui n'oblige personne: Reuoquez vostre arrest : ne defendez point ce que vous ne pouuez empescher : n'empeschez point les autres de iouyr du priuilege que vous refusez, ne chocquez point la volonté du Roy, ne censurez point ses Edicts, n'arrestez point le cœur de ces intentions, n'attirez point son courroux dessus vous, & sur tout, prenez garde de n'encourir de rechef le blasme qu'on vous donnoit il y a six ans, id'auoir esté cause de tous les troubles qui aduindrent l'an 1614. par les remonstrances que vous veniez faire souuent au Louure, & par les plaintes ordinaires que vous semiez par tout du pretendu desordre, & desreiglement de l'Estat, qui donnerent subject aux Princes qui s'estoient mis à l'escart de faire publier vn Manifeste, & en suite leuer la baniere pour en retrancher, a ce qu'ils disoient, la reformation, au lieu donc qu'il estoit aisé d'assoupir le feu d'vne guerre ciuille dedans ses propres cendres, par des bons accommodemens, & de contenter vn cha-

cun, vous le fistes allumer d'auantage, & gagner si auant, qu'on fut à la veille de voir le total embrasement de la France. Vous me direz que c'estoit vn bon zele: mais il falloit voirs'il estoit comme dit S. Paul, suiuant la science, c'est à dire suiuant la raison d'Estat, qui est bien differente de la raison du droit escrit.

Considerez encore, Messieurs, que les autres Cours Souueraines n'approuuent nullement ces passe droits & licences que vous prenez contre la puissance Royale & se separant entierement de vous, qui deuriez leur seruir de miroir & d'exemple, non seulement en ce qui regarde la science de bien iuger, mais encore bien obeyr à son Roy.

Retraçtez vous donc de vous mesmes & n'entendez point l'enregistrement d'un Edit qui casse vostre Arrest avec la difference, possible, de ne vous mesler plus des affaires d'Estat, de vous assembler pour ce faict, sans permission du Roy: car vostre institution n'est que pour vacquer à la Iustice, & rendre à chacun ce qui luy appartient sous l'auctorité du Roy, qui vous establit Iuges des differens qui suruiennent entre le demandeur & le deffendeur, tant pour le Ciuil, que pour le Criminel, & le soulager en cela, tandis qu'il s'occupe avec son Conseil aux plus graues & importantes affaires de son Estat. desquelles il ne vous est permis de prendre cognoissance, sinon quand il vous faict l'honneur de vous y appeller, ou de vous en faire executer les resolutions, par la verification de quelque Edit ou declaration. Bien est il prest tousiours d'ouyr les humbles remonstrances que vous luy pouuez faire sur les subjects qui se presenteront, mais s'il veut passer outre, il faut acquiescer à ses volonte, & captiuier, comme on faict en maniere de foy, son Iugement à l'obeissance de son Superieur, & c'est le vray moyen de conseruer vostre auctorité, de laquelle vous estes

tant ialoux: car toutes, & quantesfois que vous voudrés faire bresche à celle du Roy, seulemēt de parole il diminuera la vostre de parole & d'effaiēt. Mais si vous conspirez vnanimement à maintenir la Royale grandeur, & secondez par le pouuoit, qu'il vous donne ses bonnes intentions, il sera vostre protecteur, il auctorisera vos iugemens, il vous conseruera vos droicts, & vous fera respecter par tout les grands Royaume.

Au reste ne prenez en mauuaise part ce petit discours faiēt sans aucune sorte d'interest ou de passion, par vne personne qui n'a point vne plume venalle, & qui n'est gagé pour cela n'ayant iamais eu pension ny appointement, ou autre particulier bien faiēt du Roy ny pretention d'en auoir, ou d'en meriter, mais qui est (comme bon subject) zelateur de l'auctorité sacrée de son Roy, ne pouuant souffrir qu'on y touche sans en faire esclater le resentiment, & qui d'autre costé sera tousiours prest de tourner la pointe de sa langue pour def fendre l'auctorité de vostre Auguste & Venerable compagnie, quand on luy voudroit iniustement oster le lustre & la gloire qui luy appartient, & que le Roy mesme luy conseruera tousiours tandis qu'elle se maintiendra dans les termes du respect, & de l'obeissance.

FIN.



